



## Exposiziun ambulanta davart depressiuns

*Sin la plazza Puntreis a Mustér pon ins observar actualmain in'exposiziun davart depressiuns.*

5



## Mund d'energia: referats e porta averta

*L'uniun Mond d'energeia Ela vul sensibilisar la populaziun per energias indigenas e regenerablas.*

8

Fögl  Ladin

GASSETTA ROMONTSCHA

CASA PATERNA/LA PÜNT

LA VOUSCH DA SURMEIR

 südostschweiz

# LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

# Das schibas top modernas

La Secziun da catschadurs Vallatscha ha novs indrezs da sittar ed in stan sin 150 meters

DA HANS HUONDER / ANR

■ **Il catschadurs da Medel disponan ussa d'in stan da sittar sin la distanza da 150 meters. En connex cun la realisaziun dil niev tschaffaballas ha la secziun era acquistada duas schibas electronicas dil tip Sius Ascor AC13.**

Dapresent han las societads da tir, respectivamein las vischnancas, l'incumbensa da sanar lur stans da schibas. Leu sto il plum vegnir allontanaus ord la tiara. Quei ei buc auter en Val Medel nua ch'igl indrez da sittar sesanfla sut il vitg da Curgliia. En quei connex ein era sedadas discussiuns davart igl avegnir dil tir. Il catschadurs che sesurvevan dil medem stan da schibas sco ils tiradurs da 300 meters ein sedecidi en quei connex da realisar in agen tschaffaballas conform allas prescripziuns. Il tschaffaballas vegl survecha als tiradurs aunc entochen maximalmeins la fin digl onn 2020. Tenor il president dalla Secziun da catschadurs Vallatscha, Ursin Venzin, vegn la Societad da tir Scopi-Medel sliada si silsunter. Il stan da sittar sco tal duei ir vi els mauns dils catschadurs, aschia che lezs possedan lu egl avegnir igl entir menaschi per lur exercezi da tir ad Urlatsch.

## Distanza da 150 meters

Grazia alla constellaziun topografica dil liug ha la secziun saviu realisar in stan da sittar sin la distanza da 150 meters. Sittau vegn vinavon dalla casa da tir existenta

anora, da niev en in caset cun duas schibas electronicas ed il tschaffaballas. Tenor Venzin ei quei in sistem standardisau cun chistas da fier e lamellas che freinan e riman las ballas. Aschia san las restonzas da quellas vegnir dismissas suenter bein e speditiv. Las duas schibas installadas ein dalla marca Sius Ascor e dil tip AC13. El-las perulas culs indrezs technics necessaris

vidlunder han custau rodund 20 000 francs. «Igl ei schibas dalla pli nova tecnologia cun in sistem da mesurar aviert. Il siet vegn numnadamein buca mesirau egl intern dalla schiba, mobein avon quella cun agid da sis magnets», di Venzin. Aschia sedattan egl avegnir era dameins cuosts da manteniment vid las schibas ed igl indrez da mesurar. Igl entir

project realisau dils catschadurs dapi igl october cuosta 55 000 francs. En quel ein era cuosts per ina nova cuschina el stan da sittar. Per che la secziun possi tener ils cuosts en rama han commembras e commembers prestau rodund 700 uras da lavur cumina. Tenor il president han tuttas lavurs saviu vegnir exequidas dils commembers cun excepziun dallas sanitaras: «Sulettamein per quellas havein nus giu negin specialist ell'uniun.»

## Tener ensemen la secziun

Cul stan da 150 meters dispona la secziun ussa d'ina fetg bun'infrastructura da sittar. Il tir sco tal ei – en cumparegliaziun cun quel da 100 meters – pli preten-sius. «Ei drova segiramein aunc in tec d'pli disciplina. Sin quella distanza vesan ins lu aunc meglier sch'ins ha sittau bein ni buc», constatescha Venzin ch'ei dapi otg onns president dalla secziun. Il stan stat dil reminent era a dispoisiziun a catschaduras e catschadurs d'ordeifer la secziun che vulan exercitar sin quella distanza. In dils motivs ch'ils catschadurs han vuliu mantener ella Val lur activitad digl exercezi da sittar ei segiramein l'uniun sco tala: «Sche nus fussen sedecidi da desister egl avegnir d'in stan da sittar havess la secziun probablamein buca giu gronds aspects d'exister egl avegnir.» La Secziun da catschadurs Vallatscha ch'ha saviu festivar il giubileum da 75 onns igl onn vargau dumbra 35 commembras e commembers actives sco era 18 passivs.



Il cau da material Damian Bundi (sen.) ed il president dalla Secziun da catschadurs Vallatscha Ursin Venzin avon il stan cun duas schibas electronicas.

FOTO H. HUONDER